

## QVÆSTIO MEDICA.

MATVTINIS EXCVTIENDA DISPVATIONIBVS, IN SCHOLIS

MEDICORVM, DIE IOVIS II. MAIL, MAGISTRO SIMONE BASIN

DOCTORE MEDICO PRESIDE PRVDENTISSIMO.

*An omni tempore medicandum.*

**A**NNI TEMPORA ad rerum vicissitudines, & nouas earundem productiones, maturitatesque proferendas à Deo Optimo Maximo creata; ab astro-  
rum, & cœli conuersione, solis præsertim motu, ac Lunæ, & cœlesticis causis ortum habent; ex quorum postea mutationibus, omnium, quæ terra,  
marique gignuntur, initia, causæque ducuntur! Ea autem temperamenti sic differunt, vt omnibus tamen omnes morbi nascantur: sed alijs quàm alijs, vt  
autumno malorum Lerna, & æstiuorum nutritore, quàm vere frequentiores, & periculosiores: Quibus præsentibus (nisi symptomata magis vrgeant)  
debetur curatio, vt imminetibus præcautio: vtrique autem perficitur indicatione, quæ non est iuuantis comprehensio simul cum comprehensione  
nocentis sine obseruatione, aut ratiocinio adueniens: neque etiam agendorum insinuatio tantum, sed *ἡμετέρας τῆς ἀπορίας*.

**I**NDICATIO in genere duplex, alia enim sanitatem similibus tutandam, alia verò morbum contrarijs auxilijs profligandum designat: hæc autem  
iterum duplex, nam si à morbo desumitur *ἡγεμονική*, si à causa *καθαρτική* nuncupatur; quæ enim à symptomate deducitur non est legitima, nec  
methodica: *ἡγεμονική* rursum triplex, prima quæ à natura solius morbi deducta, genus declarat remedij; cuius tot sunt idæ quot & morborum, tam  
rudiphibeculæ, quam peritis medicis familiares & notæ: altera est, quæ an remedium à prima indicatum scilicet, & sine grauiore damno usurpari pos-  
sit, insinuat; quæque à partium temperie, substantia, consistentiâ, actione, vsu, situ, figura, connexione, sensu, & consensu originem sui ducens,  
prudentem medicum facit, vt tertia peritum:

**H**ÆC enim & qualitatem securi remedij, & quantitatem, atque etiam vtendi modum præscribit accuratius: Qualitas remedij frequenter à morbo, sæpius  
à causa si coniuncta sit, vt cacochymia & plethora: illa enim propriè & per se purgationem: hæc verò sanguinis missionem (minus quàm illa securam)  
primariò indicat: Quantitas verò iusta auxilij particularis, & si certò non potest præscribi, tamen coniecturâ quâdam potest explorari: Ea autem &  
qualitatis modum, & medicamenti pondus comprehendit, atque mensuram, quæ omnia morbi natura, corporisque totius, & singularum partium  
temperies, dignitas, virtus, sensus, item situs, & figura definiunt: vtendi denique ratio, & medicamenti formam, & affecti loci naturam & exhibendi re-  
medij occasionem sub se complectitur: forma medicamenti solida debet esse, liquida, vel mediocris pro illius consistentiâ, humoris fluxilis, vel tenacis  
natura, partisque conformatione, & positura.

**S**I QVIS administrandi medicamenti modus est; & præcipuè purgantis, à tempore pendet & occasione: tempus astrorum ortus & occasus, temperiem aëris,  
hominis ætatem, morborumque tempestatem designat; ortus & occasus syderum, cum in ambiente nos aëre nullas excitant mutationes, medico cathar-  
ticum præscripturo non sunt spectandi, sicut nec aëris intemperies, nisi causa sanitatis existeret, aut morbi; ideoque purgationes licet sub cane, & ante canem  
nem aliquando sine periculo; sæpius tamen cedunt oportunè, quæ æstate per inferiora, hyeme per superiora etiam sunt ex vsu, si morbus, si causa  
morbi, si laborantis natura efflagitent.

**E**T ATIS autem nostræ, vt morbi, quatuor sunt tempora, ita distincta, vt in illis non ad numerum annorum, sed ad corporis habitum: in his verò non  
ad numerum dierum, sed ad signa coctionis sit aduertendum; concoctio non est humorum qui per initia excernuntur, sed in ijs cum apparet, celerita-  
tem iudicij, & securitatem portendit semper: cam tamen natura non semper expectat: natura autem adminiculante; vel etiam quiescente circumspicitur  
medicus scilicet mouet, cum vires fortiores, ac symptomata debiliora, vt sunt non in principio modò & finè, sed sæpè etiam in statu: imò & cum ipsa  
sunt vehementiora; præcipuè si materia turget, tam in senè, quam iuuenè, vtero gerente, quam recens enixa: in talibus enim tardare malum.

*Ergo omni tempore medicandum.*

ASSEREBAT LVTETIÆ CLAVDIVS GERVAIS PARISINVS, A R. S. M. DC. XIII.

F.M.P.  
BIBLIOTHECA